

In questo pregadi fonno chiamati alcuni cavalier e altri, fin 25 patricij, acciò vadi contra l' orator yspano.

Fu posto per l'horo la commission zeneral di sier Alvise Mocenigo, andato orator al re di romani. Ave tutto il conseio.

Fu posto, *ut supra*, far do exatori, per coleio, a li governadori, a scuoder le 35 et 40 per 100. E fo 70 di no, 71 di sì. È presa.

Fu posto, scriver a Zacharia, secretario, *in materia sancte Mauræ*, per li savij dil conseio, sier Hironimo Querini, savij a terra ferma, sier Troian Bolani, Jo et sier Francesco Morexini, savij ai ordeni, *licet* Jo volesse una certa zonta di ducati 500 dil Zante *etc.*, *tamen* rimasi sul scriver; il resto di savij volse indusiar. Jo, Marin Sanudo, fui el primo, per la mia opinion. Poi parlò sier Piero di Prioli, per l' indusia. Rispose sier Polo Barbo, procurator; poi sier Piero Balbi. Rispose sier Hironimo Querini; poi sier Alvise Malipiero. Rispose sier Troian Bolani. Andò la parte: 3 non sinceri, 2 no, 65 di scriver, 96 di l' indusia. È preso questa, con gran credenza.

Fu posto, per nui, che sier Hironimo Zustignan, stato orator al soldan, sia commesso a li avogadori e vengi di Cypro; hora, che è stà visto per nui il processo e aldita la relation di sier Bernardin Loredan, fo synico, che 'l dito non vengi, et, per autorità dil pregadi, sia asolto di tal commission: 1, 14 di no, 102 di la parte.

Fu posto, per nui, scriver in Cypri, vadi li consieri a far il praticho, *videlicet* uno la  $\frac{1}{2}$  di l' isola; e, tornato, vadi l' altro; e cussi, comme haveva ducati uno al zorno per spexè, cussi habi ducati 1  $\frac{1}{2}$ , et vadino al tutto. Ave tutto il conseio.

Fu posto per sier Anzolo Trivixan, consier, e li savij ad terra ferma, venendo l' orator yspano qui, saria mal non farli le spexe, cussi come *alias* fu fate e si fa a quel di Franza; perhò si li dagi ducati 100 al mexe, e si pagi le barche. Contradixè sier Marco Antonio Morexini, el cavalier, savio dil conseio, dicendo non hè da butar via danari. Li rispose sier Piero di Prioli, savio a terra ferma. Et il Morexini messe di farli le spese la prima sera, pagarli le barche et farli uno presente di cosse comestibili per ducati 25; e questo, per non meter suspeto al re di Franza. Andò la parte: 2 di no, dil Morexini 22, dil consier 134; e fu presa, vol i 3 quarti.

*A dì XVI novembrio.* In colegio. Vene l' inquisitor con uno processo, fato contra uno di Seravalle, richo citadin, nome Antonio..., qual diceva

molte heresie, e fo leto parte dil processo, e una letera di don Marco di Maphei, vicario dil vescovo di Ceneda, a la Signoria, et la sententia, per aversi chiamà in colpa, *justa* i canoni; condanà ducati 200 a la Signoria, 100 al papa, altri a chiesie e ducati X a l'horo inquisitori. Or fo laudà per il coleio tal sententia, e scritto mandi li danari a la Signoria, *tamen* lui si apella in corte di Roma.

Vene l' orator di Franza, dolendosi era stà trato arme per Spagna, pèr valuta di ducati 6000, portate a Lion, e transfugà in barche poi in nave *etc.*; e fè gran querimonia. La Signoria molto *etiam* si dolse; commesse la inquisition a li avogadori di comun. Et per coleio fo scritto in Franza, si giustificchi, o sapemo, et è *solum* per valuta di ducati 550, et dichi al re *etiam* nui ne duol.

*Da Padoa.* Come sono stati a l' hostaria a visitar l' orator yspano, verà qui fin doy zorni. Fo posto a star in la caxa da cha' Corer, dove *alias* stete, *licet* lui non volesse quella.

*Da Spalato, di sier Zuan Antonio Dandolo, proveditor, di 24.* Come è stato a Clissa a veder quelli lochi; si 'l si fesse una torela a uno passo, con ducati 50, varderia il teritorio, ma è soto il ducha Corvino. *Item*, è stà dito, il ducha daria Clissa a la Signoria con partido; et a questo li fo scritto, vedesse operar et avisase.

*Da Zara, di sier Francesco Contarini, capetanio, di 26 octubrio.* Comme andò a Nona con alcuni zentilomeni, citadini, il comito, inzegner et contestabile. A di 21 parti; fò a Ponta Dura, et, visto dove se diceva fabricar, dice è spesa butà via; voria 1400 passa di muro; *unde* fo terminà per tutti non far 0. Veneno poi a Nona, e, visto il locho e il sito, con pocha spesa concludeno si faria fortissimo. E il comito vol far una rocha di la porta di terra ferma, verso il ponte, con uno fosso a torno, con do alle di muro, con bombardiere, e cavando con bon tempo certo paltan; et far uno castelan con page 25 et uno caporal. *Item*, a la porta di Santo Ambrosio far una altra rocheta di pocha spesa; staria uno caporal con 6 compagni; poi conzar le mure a torno; si spenderia ducati 200. Or, ritornati a Zara et con li citadini parlato e col conte, tuti laudò tal opinion; et uno missier Sabadin di Sope, zentilomo de lì, parlò per tutti, che facendo saria la conservation di Zara. E la spesa, disse l' inzegner qual vol far il modello, saria da ducati 3000. *Item*, lo mandò a Lavrana e Nove Gradi, e à fato uno disegno a fortificarli; voria ducati 1300, ma 500 per Lavrana, et 200 a Nadin basteria. Or quelli, prima